

Na osnovu člana 13. Zakona o principima lokalne samouprave („Službene novine Federacije Bosne i Hercegovine“, broj 49/06.), člana 14., a u vezi člana 3. i 6. Zakona o ustanovama („Službeni list RBiH“, broj 6/92., 8/93. i 13/94.), člana 3. i 14. Zakona o muzejskoj djelatnosti („Službene novine Tuzlanskog kantona“, broj 10/02. i 13/11.), člana 5. i 41. Zakona o registraciji poslovnih subjekata u Federaciji Bosne i Hercegovine („Službene novine Federacije Bosne i Hercegovine“, broj 27/05., 68/05., 43/09. i 63/14.) i člana 6. Statutarne odluke o organizaciji Grada Tuzla u skladu sa Zakonom o Gradu Tuzla („Službeni glasnik Grada Tuzla“, broj 1/14., 3/15., 7/15. i 12/15.), Gradsko vijeće Grada Tuzla, na sjednici od 30. marta 2017. godine, donosi:

ODLUKU
o pokretanju postupka spajanja javnih ustanova kulture
u Javnu ustanovu Centar za kulturu Tuzla

Član 1.

Ovom Odlukom Gradsko vijeće Tuzla, kao osnivač Javne ustanove Međunarodna galerija portreta Tuzla i Javne ustanove Dom mladih Tuzla, pokreće postupak spajanja ove dvije ustanove kulture u Javnu ustanovu Centar za kulturu Tuzla. U cilju provedbe postupka spajanja javnih ustanova, Odlukom se definišu aktivnosti, rokovi i nosioci poslova koje je nophodno izvršiti kako bi se izvršio upis u registar spajanja poslovnih subjekata.

Član 2.

Direktor Javne ustanove Međunarodna galerija portreta Tuzla i direktor Javne ustanove Dom mladih Tuzla zajednički će izraditi Elaborat o opravdanosti spajanja ustanova, koji će sadržavati ekonomska opravdanost, kao i opravdanost u smislu poboljšanja kvaliteta i kvantiteta kulturnih sadržaja Grada s prostornim i kadrovskim resursima kojima će raspolagati JU Centar za kulturu Tuzla. Rok za izradu Elaborata je 15 dana od dana stupanja na snagu ove Odluke.

Član 3.

Direktor Javne ustanove Međunarodna galerija portreta Tuzla i direktor Javne ustanove Dom mladih Tuzla, svako u svojoj ustanovi će obezbijediti da se izvrši popis sve pokretne i nepokretne imovine sa kojom raspolažu. Rok za popis je 15 dana od dana stupanja na snagu ove Odluke.

Član 4.

Služba za ekonomski razvoj i društvene djelatnosti Grada Tuzla, sačinit će ugovor o spajanju javnih ustanova, koji će sadržavati naziv osnivača, naziv i sjedište nove ustanove, djelatnost ustanove, unos osnivačkog kapitala u novu ustanovu, izvore i način obezbjeđivanja sredstava za rad ustanove, međusobna prava i obaveze između osnivača i ustanove, odredbu o

preuzimanju svih poslova te zaposlenika zatečenih na preuzetim poslovima, kao i opreme, arhive, sredstva za rad i finansijska sredstva, kao i sva prava i obaveze bivših javnih ustanova, način raspolaganja viškom prihoda nad rashodima i način na koji se pokriva višak rashoda nad приходima, prava, obaveze i odgovornosti ustanove u pravnom prometu, lice koje će do imenovanja organa rukovodenja predstavljati i zastupati ustanovu i njegova ovlaštenja i odgovornosti, rok za donošenje pravila ustanove, imenovanje organa upravljanja i rukovodenja ustanove, druga pitanja od značaja za rad ustanove. Rok za izradu ugovora je 15 dana od dana stupanja na snagu ove Odluke. Potpisnici ugovora će biti direktor Javne ustanove Međunarodna galerija portreta Tuzla i direktor Javne ustanove Dom mladih Tuzla.

Član 5.

Na ugovor o spajanju ustanova obavezno je pribaviti mišljenje Pravobranilaštva Grada Tuzla. Na ugovor saglasnost daje Gradsko vijeće Tuzla. Nakon dobijanja saglasnosti, Služba za ekonomski razvoj i društvene djelatnosti Grada Tuzla, obezbijedit će notarsku obradu ugovora o spajanju.

Član 6.

Za koordinaciju i kontrolu svih aktivnosti u vezi s postupkom spajanja javnih ustanova zadužuju se Služba za ekonomski razvoj i društvene djelatnosti i Stručna služba za poslove Gradonačelnika.

Član 7.

Odluka stupa na snagu danom donošenja, a bit će objavljena u „Službenom glasniku Grada Tuzla”.

GRAD TUZLA PREDSJEDAVAJUĆI

Gradsko vijeće

Broj: 01-05-2853-2017 Aleksandar Vujadinović

30. mart 2017. godine